

1. Advent:

isch das fröid

isch das fröid:

ig wott iz

iz

iz nid morn

ig iz

oder isch fröid ha das:

mir warte nüün monet ufenes chind
dr weize brucht zwöi bis drü jahreszyte
e boum es paar jahr

es mönscheläbe duret 80 – 90 jahr
imene ougblick isch es usglöscht
ei unachstami kurve fahre längt
e virus, e erkrankig
oder e fähltritt ufemene steile wäg

was isch fröid

vielleicht eifach
sorg ha zu eim sälber
u zu angere
u allem si zyt laht
u mängisch heisst angerne ihri zyt la
sich sälber beschränke

es ching cha wärde
we me sorg het zuen ihm
iz u über d jahr wos brucht
bis es sälber cha sorg ghä
zu sich u zu angerne

nur iz ig
schänkt däm ig kei fröid
ächti fröid liegt im mitenang
u de zyt wo alles brucht, dass es cha wärde

Jürg Meienberg

